



Predigt zur Konfirmation am 9. Mai 2024

Thema: «Mir frage üs...»

Pfrn. Barbara Stankowski

Mir frage üs... Üses Läbe besteit us Frage. Was legg ig a? Wie wird ds Wätter? Wird YB Meischer? Wie lang geit dr Gottesdiensch? Was git's ächt Zmittag? Und so witer... Frage ghöre zu üsem Alltag.

Am Afang vor Konfvorbereitig ha ig öich la ufschribe, was dir öich fraget. Und drbi hei mir natürlech nid a so Alltagsfrage dänkt, sondern äbe a die grosse Läbesfrage. Zu es paar vo öine Frage heit dir vori öii Gedanke mit üs teilet. Ufgeschribe heit dir denn no viu meh Frage. Zum Bispui:

- Wieso macht dr Mönsch immer wieder so viu schlächts, obwohl mir doch ds Guete möchte?
- Wenn's e Gott git: wieso git's de Chrieg?
- Was chunnt nachem Tod?
- Macht hürate ir hütige Zyt no Sinn?
- Wieso liebt üs Jesus bedingigslos?
- Wieso nütze vieli Lüt die chrischtlechi Religion als Grund, für anderi ds diskriminiere? Steit Gott nid für Liebi und Akzeptanz?
- Wie cha me trotz negative Ereignisse witerhin d Läbesfröid bhalte?

Ig würdi öich gärn hüt zur Konf es Büechli schänke mit aune Antworte uf öii Frage. Leider chani das nid. Die meischte schwierige Frage cha me nid churz und eifach beantworte und mängisch git's ou schlicht kei Antwort.

Aber Frage si wichtig. Ir Schuel sit dir sicher scho mängisch ufgforderet worde, Frage z'stelle. Es gäbi kene dumme Frage. Und frage dörf me aues, wenn me d Antwort nid schüücht.

Mängisch begägne ig dr Idee (vo usse oder sogar i mir inne), dass es wenn's um Gott und ume Gloube geit, scho okay isch Frage ds ha. Aber no besser wär's, wenn me gar keni Frage hätti sonder wenn me d Antwort weiss oder wenn me Sache eifach gloubt. Aus Chrischt muess me doch nume d Bibel läse und bätte de löse sech au Frage uf oder me findet d Antwort uf jedi Frag.

Ganz so eifach isch es nid. Es stimmt, dass mir ir Bibel Antworte finde. Es stimmt definitiv, dass Gott üs Antworte schänkt uf Frage. Aber deu Frage blibe.

Mit üsem Frage si mir i gueter Gsellschaft. Ir Bibel wird zimli viu gfragt. Ig ha's nid säuber nachezellt, aber ig ha gläse, dass es gäge die 1000 Frage ir Bibel git. Und was interessant isch: vo dene 1000 Frage si nume öppe ei Drittel Frage, wo Mönsche

stelle. Dr vii grösser Teil vo aune Frage si Frage, wo Gott oder Jesus Mönsche stellt. Frage stelle isch nid nume okay, es isch sogar biblisch. Es isch öppis, wo Jesus ou gmacht het, immer wieder. Ig gibe öich es paar Bispiu vo Jesus-Frage:

- Wo Jesus nach Oschtere zwene Jünger begänet ufem Wäg nach Emmaus, fragt är: «Über was redet dir da?»
- Chranki het Jesus gfragt: «Was möchtisch du, dass ig dir tue?»
- Jesus fragt d Ehebrächerin, nachdäm aui ihri Steine a Bode gleit hei und gange si: «Isch niemer me da, wo di wott verurteile?»
- Är het sini Jünger gfragt: «Für wän haltet dir mi?»
- Imne Sturm fragt är d Jünger: «Wieso heit dir Angscht?»
- Bir Fuesswäschig fragt Jesus d Jünger: «Chömit dir drus, was ig öich ize grad ta ha?»
- Und am Ostermorge fragt Jesus d Maria: «Wieso grännisch du?»

Das isch nume e Bruchteil vo de Frage, wo Jesus oder Gott stellt ir Bibel. Es macht e Unterschied, öb me öppis gseit überchunnt oder öb me gfragt wird. Frage hei ou öppis z'tue mit Beziehig. Frage bringe üs enand necher. Aui die Frage vo Gott ad Mönsche si e Hiiwyys, dass Gott e Beziehig suecht mit üs. Gott predigt üs nid eifach a. Är fragt, wiu ihn üsi Antwort interessiert. Und mir dörfe ou ihn frage. Üsi Frage bringe ou üs ine Beziehig zu Gott.

Ig möchti öich vomne Erläbnis verzelle, wo villicht hiuft illustriere, was ig meine. Mir hei es paar Jahr in Asie gläbt und dört hani dörfe Mönsche kenne lehre, wo no chli ufne anderi Art Bibel läse und gloube. Einisch bini are Adväntsretraite si und mir hei d Wiehnachtsgschicht gläse. Und d Ufgab isch gsi, dass mir söue Frage stelle a Text. Jedi Frag sigi erloubt, es gäbi keni dumme oder fautsche Frage. Ds einzige, wo nid erloubt sigi, sig Antworte ds gäh. Mi het das zerscht chli speziell dünkt, aber när si immer wie meh interessantige Frage cho: Wo genau het dr Kaiser Augustus gläbt? I wie vii Sprache isch ächt dä Befähl übersetzt worde? Was isch eigentlech usecho bi dere Volkszählig? Wie alt si Maria und Josef denn gsi? Sie si zum erschte Mal uf Bethlehem gloffe oder hei sie dr Wäg scho vo früecher kennt? I welere Tonart hei d Ängle gsunge hei? Um weli Zyt isch Jesus genau uf d Wält cho?... Und so witer. Es isch sehr luschtig gsi, aber ig ha mi chli gfragt, was das bringt.

Wo mir fertig si gsi, het's e Momänt Stilli gäh und ig ha dänkt, när gäb's de e Input zur Gschicht und Antworte uf üsi Frage. Aber nach dr Stilli het d Leiterin gseit: «Amen. Dir chöit iz für öich ga spaziere.» Und ig ha dänkt: «Geit's no?! Das isch iz zwar luschtig gsi, aber was söu iz das bracht ha? Iz müesste doch Antworte cho, wiu Antworte bringe eim witer. Aber so bini halt ga spaziere und uf däm Spaziergang hani plötzlech gmerkt, dass mir die Gschicht vor Geburt vo Jesus no nie so nach isch gsi wie nach au dene Frage. Und düre Text düre isch mir ou Jesus so nach gsi, wie no sälte i mim Läbe. Die Frage hei mir necher zu Jesus bracht, aus es Antworte hätte chönne.

Ig wott drmit nid säge, dass Antworte nid wichtig si. Mir bruuche Antworte. Es isch wichtig, mitenand und mit Gott Antworte z'finde. Aber unterschätzt nie dr Wärt vom Frage. Ig bi überzüg, dass Gott, wo e BeziehigsGott isch, sech üs grad i üsem Frage cha zeige und üs nach chunnt.

Ig mache öich Konfirmande und üs aune Muet, üsi Frage ärscht ds näh, nid wäg z'schiebe und se zum Thema mache. Diskutieret se mitenand, mit öine Eltere und Familie und bringet se zu Gott. Und dir wärdet merke: sie bringe Beziehig.

Vori hei mir im Lied "Lighthouse" gsunge: *«I will trust the promise, you will carry me safe to the shore»*. Ig vertraue dim Verspräche, du wirsch mi sicher as Ufer trage».

Das wünsch ig öich, üs aune vo Härze: dass dir immer wieder erläbet, wie Gott da isch, grad ou i öine Frage inne. Dass är öich e Lüüchturm isch und dass dir dörft d Erfahrig mache, dass är öii Frage ushaltet und öich immer wieder as sichere Ufer bringt, wo dir Bode unger de Fuess heit und die nächschte Schritte chöit gah, trotz und mit aune Frage.